

SI NUNCA M'HESEN DITO OS SENTIMIENTOS QUE ISTES DÍAS SE SON
REVELLAUS, HESE DITO QUE YERA DIFICIL, PERO AQUÍ BI SON, AQUÍ BI
SOI, FENDO ALCORDANZA DE MOMENTOS EN QUE CREYEBE QUE IBE Á
MORIR, 21 AÑOS TENEBE E O CONSUELO YERA SIEMPRE MI MAI Á CANTO,
NUEI E DÍA...LA VEIGO, LA SIENTO E ME CONSIDERO PUPIELLO Á OS MÍOS
AÑOS, E MÉS DENDE A MUERTE DE MI CHIRMÁN. VA TA ELA ISTE POEMA
CON FOTO QUE AMO QUITADA EN CASA EN L'AÍNSA EN PRIMAVERA DE
1972, MI MAI E MI TIA FELISA, DOS SERS QUE TA SIEMPRE VIVIRÁN EN TOZ
OS QUE LAS CONOXIRON.

Si alguna vez me hubieran dicho los sentimientos que estos días se han despertado,
hubiera dicho que era difícil, pero aquí están, aquí estoy, recordando momentos en que
creía que iba a morir, tenía 21 años y el consuelo era siempre mi madre al lado, noche y
día...la veo, la siento y me considero huérfano a mis años, y más desde la muerte de mi
hermano... Para ella va este poema con foto tomada en casa en L'Aínsa en primavera de
1972, mi madre y tía Felisa, dos seres que para siempre vivirán en todos las que las
conocieron

MI MAI (Mi madre)

ventiún años tenebe primavera enverada morindo-me yere yo lo sabebe e tu lo
padexebas
me regalés a bisa d'o mar en calma d'a tuya gollada abrigallo seguro n'aquers burces de
razonaus miedos
me dies o cristalino esgotaziar silencioso d'o fontanal d'as tuyas parolas nunca no ditas
mas siempre sentidas
a caricia d'os tuyos pasos de algodón que yo contabe ta midir minutos entre que me
t'amanabas sinse crebar o silencio
astí bi yeras abre siempre firme de fuellas protectoras entremistante yo me'n ibe con o
penar d'a tuya dolor ferida ubierta
a tuya man ixaminaba estrelas de chelo n'a fren mía infierno de fuego coscién de que
con tu en nueis insomnes me nugabe á la vida

..

¿talmén nunca no te dicié allora que te quereba?

..

agora més viello que no pas tu alavez en ista tardi roya sinse ababols ye un estralazo de
luz en l'alma o tuyo tringlero recuerdo
me miro lo mar que tu aguaitabas me i pierdo igual como tu cuan ya enferma n'a tuya
mirada encara viva s'eternizaba o tiempo
tanimientes o ibón azul d'os tuyos uellos daba color á las olas e sinse reconoixer-nos
mos catabas e febas a riseta
iste mesmo mar que agora veigo posau cara t'o sur aquí chustamén aquí an que en tu se
complegaban augua e cielo
yo pupiello d'os tuyos uellos d'os tuyos tovos pasos d'o paño refrescadero d'as tuyas
mans despertando-me de negras barucas
digo sinse dicir en tanto s'eslangue o día que me punchas como agulla resucitadera e
siento que t'amo més que nunca

Villaricos , paseyo marítimo, 5 de chunio de 2013, 20 h (treballau entre os días 4, 5 e 6
de chunio. Actualizau o 24 de chinero de 2013). Ánchel Conte

